

URREZKO AIZKORA. Olasagastik du 2. faseko denborarik onena eta Nazabalek bigarrena

Finalera sartzeko lehia polita

Orain arte ez dute elkarren aurka jokatu torneoan, eta iazko sasoiari Nazabal hobeia izan zen

Koldo Alduntzin | **DONOSTIA**

Isidro Deuna eguna ospatzen da gaur Eibarko Arraten, eta Urrezko Aizkoraren finalerako txartel bat erabakiko da gaur. Hain zuzen ere, iaz hantxe lortu zuen Joxemari Olasagastik txartela, Larretxea menderatuta, eta gaur ere, aukera izango du Igeldokoak. Floren Nazabal izango du kontrario. Nazabalek orain dela 23 egun jokatu zuen Larretxearen kontra, eta mendean hartu zuen Arantzakoa 34 segundoko aldeaz. Olasagastik ere irabazi egin zion Larretxeari minutu eta 21 segundoz.

Orain arte jokaturiko hiru urteetan, ez dute elkarren kontra jardun torneoan. Bai, ordea, Euskal Herriko Txapelketan eta Urrezko Kopan. Euskal Herrikoari dagokionez, 1995ean 28 segundoko aldea ateratzen zion Olasagastik Nazabali, 1996an 4 minutu eta 40 segundoko aldea, 1999an 4 minutu eta 32 segundoko aldea. Iaz, aldiz, Nazabalek 2 minutu eta 36 segundo kendu zizkion Igeldokoari.

Iaz hobeto Nazabal

Nafarrak dio: «Iazkoa ez dut uste aintzakotzat hartu behar denik. Olasagasti gaizki aritu zen binakako txapelketan, baina hobera egin du, eta ez dut uste bion artean alde handirik egongo denik». Etxarri-Aranazkoa «joan den udaz geroztik aizkora utzi gabe» ari dela dio, eta horrela «zaila» dela irautea. Gogoratu behar da binakakoa irabazi egin zuela Peñagarikanorekin bikotea eginda. «Horregatik, negu garaia balitz, hobeto egongo nintzateke», azpimarratu du. Olasagasti kolpe azkarrekoa

FLOREN NAZABAL

Aizkolaria

«Joan zen udaz geroztik etengabe ari naiz, eta zaila da sasoiari eustea»

JOXEMARI OLASAGASTI

Aizkolaria

«Nazabal ongi ikusi nuen aurrekoan, baina nik ere denbora ona egin nuen»

da, eta berak egin du bigarren fase honetako denborarik onena (28'15"). Egungo txapelduna da, eta gogoz hartu du aurtengo ere, «aurreko urteekin alderatuta zerbait ahulago» dagoela nabarmendu duen arren.

Nazabali buruz, «Larretxearen aurka prestatuta ikusi nuen. Gainera, azkenaldian erakutsi du aizkolaria ona dela». Orain dela 9 egun jardun zuen Larretxearen aurka, eta neurri berean arituz gero, zaila izango da igeldoarra menderatzea. Donostiako Urrezko Kopan, hirtan aritu dira azken bost urteotan. 95ean minutu eta 10 segundo kendu zizkion Nazabalek, 96an Olasagastik 2 minutu eta 19 segundo, eta iaz, Nazabalek 3 minutu eta 54 segundo.

Nazabalek oinbikoak eta 45 ontzakoak plazaratuko ditu.

Olasagasti-Nazabal

Txapelketa: IV. Urrezko Aizkora. Gurea Kaiku Sari Nagusiaren lehen multzoko 3. jardunaldia.

Lekua: Eibarko (Gizpuzkoa) Arrate gaina.

Ordua: 18.00 (gaur).




KOLDO ALDUNTZIN

Floren Nazabal Larretxearen kontrako saioa amaituta Lazkaon.


Banakako IV. Urrezko Aizkora

Lanak	1	2	3	4	
45 ontzakoak	2	45 ontzakoak	4	45 ontzakoak	2
Kanaerdiokoak	4	Kanaerdiokoak	2	Kanaerdiokoak	4
60 ontzakoak	4	60 ontzakoak	2	60 ontzakoak	4
		Oinbikoak	2	Oinbikoak	2

Lehen fasea



Bigarren fasea



IZOTZ HOCKEYA. Lionel Bilbao, Carry eta Larroque, Hormadiko jokalaririk ohiak Mulhousera joango dira

Hormadik Garbocz poloniarra eta Ducharme kanadarra lotu ditu, eta Lahtinenek berritu

Koldo Alduntzin | **DONOSTIA**

Michal Garbocz poloniarra eta Dominique Ducharme kanadarra fitxatu ditu Hormadik 2001-2002 sasoirako. Biak ala biak erasotzaileak dira. Garbocz 28 urte ditu, 1,74 metro eta 77 kilo. Joan den hilabetean, A Mailako Munduko Txapelketa

jokatu zuen Poloniarekin. Egun, Poloniako Ligan dihardu, Unia Oswiecim taldearekin. Ducharmek Hormadirekin jokatu zuen 99-00 Liga Xapelgoa, baina Kanadara joan zen ikasketak amaitzera. Lahtinen finlandiarrek berriz sinatu du Angelukoekin, eta bideratuta daude Xabier Dararmy angelutarra talde-

ra eramateko, Kanadako hockeyan jardun ondoren.

Bestetik, Baldris eta Dostal Angersa joango dira, Carry, Bilbao eta Larroque Mulhousera. Badirudi, Perez Amiensek hartuko duela eta Solaux Reimsek. Couloumbeixek, Gilletek, Larrieuk, Drouotek eta Amsellek Hormadin segituko dute.

Txekiar Errepublika munduko txapelduna laugarrenez

Gaindiezinak ari dira gertatzen Txekiar Errepublikakoak azken urteotan, igande gauean Mun-

duko Txapelketa irabazi baituzten, laugarrena erreskadan, Finlandia menderatuta (3-2). Arauzko denbora 2-2 amaitu zen, eta luzapena jokatu behar izan zuten. Horrenbestez, bost urtean lau txapela jantzi ditu, 1994an debuta egin zuenez geroztik. Olinpiar Jokoetako txapelduna ere bada (1998). Nazio horretako jokalaririk onenek (70) Estatu Batuetako NHLn dihardute, eta, Patera eta Prochazka dira aipagarrienak. Juniorretan ere txapeldunak dira txekiarrek.

TXIRRINDULARITZA

Abraham Olano:
«Ilusio handia dut eta Giroan podiuma egiten saiatuko naiz»

Erredakzioa | **DONOSTIA**

Lasterketak irabazteko premiaz askaturik, lan isila, ezkutukoa egin du Abraham Olanok, eta asteburu honetan hasi da fruituak jasotzen, Alcobendasko Klasikoa irabazi baitu. Gaurtik aurrera Asturiasko Itzulian izango da, baina ez du proba amaituko —igandean amaitzen da—, larunbatetik aurrera Italiako Giroan izango baita.

Giroan ez duela «ezer baztertzeko esan du Olanok, eta bere helburua «podiumean amaitzea» dela. Dena den, zuhurtziaz jokatu nahi du, oraindik ez dagoelako sasoi betean, eta bere helburu berak dituzten txirrindulari asko izango direlako: «Dena emateko intentzioarekin noa, baina nire egoera berean txirrindulari asko izango dira. Amets egitea libre da, eta horregatik ilusio handiarekin noa Italiara.

ESKUBALOIA

Kantabriak eta Julian Ruizek hiru urteko kontratua adostu dute

Efe | **SANTANDER**

Santanderko (Espainia) Kantabriak eta Bidasoako Julian Ruiz entrenatzaileak hiru urteko akordioa adostu dute. Ruizek Juan Jose Campo ordezkatuko du aurrerantzean zeregin horretan.

Kantabria entrenatuko duen bigarren aldia izango da Julian Ruizentzat. 1993tik 1997ra bitarte zuzendu zuen taldea, eta bere gidaritzapean, Kantabriak Asobal Liga bat eta Europako Kopa bat irabazi zituen.

Orain hilabete eskas ernatu ziren Julian Ruizek bere jaioterriko taldearen eskaintza mamitsua jaso zuen eskaintzaz mintzo ziren zurrumurruek, eta Liga amaitzeko lau jardunaldi eskas geratzen direla baieztatu da berria. Bidasoak arduradun berria bilatu beharko du orain.